

摘藻堂四庫全書薈要

史部

欽定四庫全書薈要

史部
明史卷三百十一



詳校官中書臣劉源溥

欽定四庫全書蒼要卷六千九百四史部

明史卷三百十一

大學士張廷玉等奉 敕修

列傳第一百九十九

四川土司

四川土司諸境多有去蜀遠去滇黔近者如烏蒙東川
近於滇烏撒鎮雄播州近於黔明太祖略定邊方首平
蜀夏置四川布政司使招諭諸蠻次第歸附故烏蒙烏



撒東川芒部舊屬雲南者皆隸於四川不過歲輸貢賦示以羈縻然夷性獷悍嗜利好殺爭相競尚焚燒劫掠習以為恒去省寫遠莫能控制附近邊民咸被其毒皆由規模草創未嘗設立文武為之鈐轄聽其自相雄長雖受天朝爵號實自主其地以故終明之世常煩撻伐唯建昌松茂等處設立衛所播州改遵義平越二府以後稍安戢云

四川土司一

烏蒙烏撒東川鎮雄四軍民府

馬湖

建昌衛

寧番衛
鹽井衛

越嵩衛
會川衛

茂州衛

松潘衛

天全六番招討司

黎州安撫司

烏蒙烏撒東川芒部古為竇地的巴東川大雄諸甸皆唐烏蒙裔也宋有封烏蒙王者元初置烏蒙路遂以東川芒部皆隸於烏蒙烏撒等處宣慰司烏撒富盛甲諸部元時嘗置軍民總管府而於東川置萬戶府地勢竝

在蜀之東南與滇黔壤土相接皆據險阻深與中土聲

教隔離明太祖既平蜀規取雲南大師皆集於辰沅欲

并剪諸蠻以通蜀道洪武十四年遣內臣齎敕諭烏蒙

烏撒諸部長曰西南諸部自古及今莫不朝貢中國朕

受天命為天下主十有五年而烏蒙烏撒東川芒部建

昌諸部長猶桀驁不朝朕已遣征南將軍穎川侯左副

將軍永昌侯右副將軍西平侯率師往征猶恐諸部長

未喻朕意故復遣內臣往諭如悔罪向義當即躬親來

朝或遣人入貢亟攄誠款朕當罷兵以安黎庶爾共省
之時征南將軍傅友德已分遣都督胡海洋等帥師五
萬由永寧趨烏撒復自率師由曲靖循格孤山而南以
通永寧之兵擣烏撒時元右丞實保聞海洋兵至乃聚
兵赤水河以拒之及聞大軍繼進皆遁友德令諸軍築
城版牘方具蠻寇大集友德屯兵山岡持重以待既知
士勇可甲乃縱兵接戰有芒部土酋率衆來援實保兵
與合鋒甚銳大軍鼓譟而前其酋長多中槩墜馬死大

軍益奮蠻衆力不支大潰斬首三千獲馬六百實保率

衆遁遂城烏撒克七星關以通畢節又克可渡河於是

東川烏蒙芒部諸蠻震驚皆望風降附十五年置東川

烏撒烏蒙芒部諸衛指揮使司詔諭諸部人民以雲南

已降附宜益効順中國以享昇平復諭諸部長曰今置

郵傳通雲南宜率土人隨其疆界遠邇開築道路各廣

十丈準古法以六十里為一驛符至奉行又敕征南將

軍友德等曰烏蒙烏撒東川芒部諸酋長雖已降恐大

軍一還仍復嘯聚符到日悉送其酋長入朝又諭以貴

州已設都指揮使然地勢偏東今宜於實保所居之地
立司以便控制卿其審之已烏撒諸蠻復叛帝諭友德
曰烏撒諸蠻伺官軍散處即有此變朕前已慮之今果
然然雲南之地如曲靖普安烏撒建昌勢在必守其東
川芒部烏蒙未可遽守也且留屯大軍蕩埽諸蠻戮其
渠長方可分兵守禦耳乃命安陸侯吳復為總兵平涼
侯費聚副之征烏撒烏蒙諸叛蠻并諭勿與蠻戰於關

索嶺上當分兵掩襲直擣其巢使彼各奔救其家之不暇必不敢出以抗大師俟三將軍至破禽之是月副將軍西平侯沐英自大理還軍會友德擊烏撒大敗其衆斬首三萬餘級獲馬牛羊萬計餘衆悉遁復追擊破之帝諭友德等師捷後必戮其渠魁使之畏懼搜其餘黨絕其根株使彼智窮力屈誠心欵附方可留兵鎮守又諭宜乘兵勢修治道途令土酋諭其民各輸糧一石以給軍為持久計十六年以雲南所屬烏撒烏蒙芒部三

府隸四川布政使司烏蒙烏撒東川芒部諸部長百二十人來朝貢方物詔各授以官賜朝服冠帶錦綺鈔錠有差其烏撒女酋卜實加賜珠翠芒部知府發紹烏蒙知府阿普病卒詔賜綺衣并棺殮之具遣官致祭歸其柩於家十七年割雲南東川府隸四川布政使司并烏撒烏蒙芒部皆改為軍民府而定其賦稅烏撒歲輸二萬石羶衫一千五百領烏蒙東川芒部皆歲輸八千石羶衫八百領又定茶鹽布疋易馬之數烏撒歲易馬六

千五百匹烏蒙東川芒部皆四千匹凡馬一匹給布三十疋或茶一百斤鹽如之實保復貢馬賜綺鈔十八年烏蒙知府亦德言蠻地刀耕火種比年霜旱疾疫民飢窘歲輸之糧無從徵納詔悉免之二十年徵烏撒知府阿能赴京二十一年命西平侯沐英南征英言東川強盛據烏山路作亂罪狀已著必先加兵但其地重關複嶺上下三百餘里人迹阻絕須以大兵臨之帝命潁國公傅友德仍為征南將軍英與陳桓為左右副將軍率

諸軍進討敕友德等曰東川芒部諸夷種類皆出於獠
獠厥後子姓蕃衍各立疆場乃異其名曰東川烏撒烏
蒙芒部祿肇水西無事則互起爭端有事則相為救援
若唐時閣羅鳳亡居大理唐兵追捕道經芒部諸境羣
蠻聚衆據險設伏唐將不備遂墮其計喪師二十萬皆
將帥無謀故也今須預加防閑嚴為之備烏撒軍民府
葉原常獻馬三百匹米四百石於征南將軍以資軍用
且願收集土兵從征英等以聞從之復命景川侯曹震

靖寧侯葉昇等分討東川平之捕獲叛蠻五千五百三十
十八人二十三年烏撒土知府阿能烏蒙芒部土官各
遣子弟入監讀書二十七年烏撒知府卜穆奏霑益州
屢侵其地命沐春諭之二十八年戶部言烏撒烏蒙芒
部東川歲賦羶衫不如數詔已免徵今有司仍追之宜
申明從之二十九年烏蒙軍民府知府實哲貢馬及羶
衫自是諸土知府三年一入貢以為常或有恩賜則進
馬及方物謝恩宣德七年兵部侍郎王驥言烏蒙烏撒

土官祿昭尼祿等爭地仇殺宜遣官按問八年遣行人
章聰侯璉齋敕往諭仍敕巡按與三司官往平之設烏
蒙儒學教授訓導各一員以通判黃甫越言元時本府
向有學校今文廟雖存師儒未建乞除教官選俊秀子
弟入學讀書以廣文治從之正統七年裁烏撒軍民府
通判推官知事檢校各一員十一年裁烏蒙東川知事
檢校各一員并革烏撒烏蒙遞運所景泰元年敕諭烏
撒烏蒙諸府土官普茂等以貴州諸苗叛亂恐滋蔓鄰

近宜戒嚴防守毋聽賊衆誘惑倘來逼犯便當勦殺時

烏撒進萬壽表踰期部議宜究詔以遠人宥之嗣後朝

貢過期及表箋不至者朝廷率以土官多從寬貸應賞

者給其半天順元年鎮守四川中官陳清等奏芒部所

轄白江蠻賊千餘作亂攻圍筠連縣治敕御史項橐會

鎮巡官捕之成化十二年烏撒知府隴舊等奏同知剛

正撫字有方蠻民信服今九年秩滿乞再任三年以慰

羣望從之弘治十四年烏撒所轄可渡河巡檢司言自

閏二月二十七日大雷雨不止至二十九日水漲山崩

地裂山鳴如牛吼地陷湧出清泉數十派衝壞廬舍橋

梁及壓死人口牲畜無算又本府阿都地方八月亦暴

風雨田土滄沒二百餘處死者三百餘人正德十五年

討斬芒部僂蠻阿又磔等初芒部土舍隴壽與庶弟隴

政及兄妻支祿爭襲仇殺所部僂蠻阿又磔等乘機倡

亂流劫事聞命鎮守中官會撫按官捕治至是貴州叅

政傳習都指揮許詔督永寧宣撫司女土官奢爵等討

禽阿又磔等四十三人斬一百十九級事乃定嘉靖元年命芒部護印土舍隴壽襲知府免赴京故事土官九品以上皆保送至京乃襲時壽政等爭襲不敢離任朝廷以嫡故立壽恐壽赴京而政等乘隙為亂故有是命然政與支祿倚烏撒土舍安寧等兵力仇殺如故壩底叅將何卿請於巡撫許廷光發土兵二萬五千人命貴州叅將楊仁等將之受何卿節制相機進勦政祿佯聽撫乞緩師而令賊黨阿黑等掠周泥站七星關復遣阿

核等糾集諸苗剽掠畢節諸處殺傷官軍燬官民房屋甚衆兵部言賊勢猖獗宜速征於是何卿等進勦斬首二百餘級俘二十餘人降其衆數百政敗奔烏撒卿檄烏撒土舍安寧土婦奢勿禽之安寧佯許諾僅以阿核等屍獻竟不出政兵久不解都御史湯沐以聞詔切責諸將及守巡官罪而革何卿冠帶令勦賊自贖四年政誘殺壽奪其印巡撫王軌巡按劉黻各上其事黻言從蠻情立支祿便軌以隴政支祿怙終稔惡戕朝廷命吏

罪不可赦乃命鎮巡官諭安寧縛政祿及諸助惡者時政已為官軍禽於水西追獲芒部印信前後斬首六百七十四級生禽一百六十七人招撫白烏石等四十九寨以捷聞貴州巡按劉廷篔言烏撒所獻阿核等屍及水西所縛隴政真偽未可信恐首惡尚在不無後慮請覈實五年兵部奏芒部隴氏釁起蕭牆騷動兩省王師大舉始克蕩平今其本屬親支已盡無人承襲請改為鎮雄府設流官知府統之分屬夷良毋響落角利之地

為懷德歸化威信安靜四長官司使隴氏疏屬阿濟白

壽祖保阿萬四人統之如程番府例令三年一入朝貢

馬十二匹而以通判程洸為試知府六年芒部賊沙保

等謀復隴氏擁隴壽子勝糾衆攻陷鎮雄城執程洸奪

其印殺傷數百人洸奔畢節事聞兵科給事中鄭自璧

等言鎮雄初設流官蠻情未服而有司失先事之防不

亟收遺裔隴勝而令沙保得擁孺子致煽禍一方宜速

遣總兵何卿併力勦寇於是兵部覆言隴勝非真隴壽

子故議設流官有司撫循失策遂生叛亂沙保罪不容誅當勦何卿方守松潘勢難相援宜亟趣都御史王廷相之任并敕總兵牛桓調兵速進時沙保出鎮雄府即乞降然尚持兩端欲立土官如故四川撫按以保狡悍不可馴檄瀘州守備丁勇擊之又遣使勞賜芒部撫夷卻良佐使計禽沙保保怒復叛七年川貴諸軍會勦敗沙保等禽斬三百餘級招撫蠻獠男婦以千計捷聞設鎮雄流官如舊而芒部烏撒毋響苗蠻隴革等復起攻

劫畢節屯堡殺掠士民紛紛見告兵部尚書李承勛以
伍文定專主用兵為失計疏及之而御史楊彝復言芒
部改土易流非長策又時值荒饉小民救死不贍何能
趨戰時帝亦軫念災傷令罷芒部兵俟有秋再議征討
於是四川巡撫唐鳳儀言烏蒙烏撒東川諸土官故與
芒部為唇齒自芒部改流諸部內懷不安以是反者數
起今懷德長官阿濟等雖自詭禽賊其心固望隴勝得
一職以存隴後臣請如宣德中復安南故事俯順輿情

則不假兵而禍源自塞川貴巡按戴金陳講等奏如鳳儀言金又以首惡如母響祖保等宜勦誅以折其驕氣始下撫處之令許生獻沙保等待阿濟以不死然後復隴勝故職或降為知州其長官或因或革或分隸庶操縱得宜恩威竝著章下部覆乃革鎮雄流官知府而以隴勝為通判署鎮雄府事今三年後果能率職奉貢准復知府舊銜時嘉靖九年四月也三十九年命勘東川阿堂之亂初東川土知府祿慶死子位幼妻安氏攝府

事有營長阿得革頗擅權謀奪其官因先求烝安氏不

得乃縱火焚府治走武定州為土官所殺得革子堂奔

水西賄結烏撒土官安泰入東川囚安氏奪其印貴州

宣慰安萬銓故與祿氏姻連乃起兵攻阿堂所居寨破

之堂妻阿聚攜幼子奔霑益州土官安九鼎萬銓脅九

鼎取阿聚及幼子殺之堂以是怨九鼎時相攻擊堂兵

侵羅雄州境九鼎及祿位與羅雄土官者濬等各上書

訟堂罪詔下雲貴四川撫按官會勘堂聽勘於車洪江

具服罪願獻所劫府印并需益羅雄人口牲畜及侵地
乞貸死時位及弟僕已前歿官府因訊祿氏所當襲者
堂以已幼子詭名祿哲以報據府印如故復與九鼎治
兵相攻九鼎訴之雲南巡撫游居敬謂堂怙亂請致討
且自詭當率所部為前鋒必禽堂以獻居敬信之遂上
疏言堂稔惡不悛請專意進剿為地方除害帝允部議
行川貴撫按會勘具奏居敬遽調土漢兵五萬餘進剿
雲南承平久一旦兵動費用不貲賦歛百出諸軍衛及

有司土官舍等乘之為姦利遠近騷動巡按王大任言
逆堂奪印謀官法所必誅第彼猶借朝廷之印以約土
蠻冒祿氏之宗以圖世職而四川之差稅辦納以時雲
貴之隣壤未見侵越此其非叛明矣其與九鼎治兵相
攻彼此俱屬有罪居敬乃信一偏之詭辭違會勘之明
旨輕動大衆恐生意外患且外議籍籍謂居敬入九鼎
重賄欲為雪怨及受各土官賂攘盜帑積皆有實跡請
亟罷居敬暫停征勦為便乃命逮居敬時堂聞大兵至

東川逃深箐諸將分兵於新舊諸城窮搜不獲地方民夷大遭屠掠四十年營長者阿易謀於堂之心腹母勒阿濟等掩殺堂於夏來矣石之地其子阿哲就禽哲時年八歲事雖定而府印不知所在於是安萬銓取東川府經歷印畀祿位妻寧著署之以照磨印畀羅雄土官者濬而以寧著女妻者濬子仍留水西兵三千於東川為寧著防衛水西與東川隣萬銓本水西土官故議者謂其有陰據東川之志巡按王大任以誅阿堂聞因言

東川地方殘傷該府三印悉為土官部置請通敕川貴
總督及鎮巡官按究各土官私擅標署之罪并訪祿氏
支派之宜立與所以處阿哲者部覆報可四十一年鑄
給四川東川府印初阿堂既誅索府印不獲人疑為安
萬銓所匿及是屢勘印實亡失而祿位近派悉絕惟同
六世祖有幼男阿采撫按官雷賀陳瓚請以采襲祿氏
職姑予同知銜令寧著署掌後果能撫輯其衆仍進襲
知府其新印請更名以防奸偽有旨不必更餘如議先

是烏撒與永寧烏蒙霑益水西諸土官境土相連世戚親厚既而以各私所親彼此構禍奏訐紛紜詳四川永寧土司傳中當事者頗厭苦之萬曆六年乃令照蠻俗罰牛例處分務悔禍息爭以保境安民然終不能靖也三十八年詔東川土司竝聽雲南節制時巡按鄧漾疏稱蜀之東川徧處武定尋甸諸郡只隔一嶺出沒無時朝發夕至其酋長祿壽祿哲兄弟安忍無親日尋干戈其部落以劫殺為生不事耕作蜀轄遼遠法紀易疏滇

以非我屬內號令不行以是驕蹇成習目無漢法令惟
改敕滇撫兼制東川因條三利以進詔從之先是四川
烏撒軍民府雲南霑益州雖滇蜀異轄宗派一源明初
大軍南下女土官實卜與夫弟阿哥二人率衆歸順授
實卜以烏撒土知府授阿哥以霑益土知州其後彼絕
此繼通為一家萬曆元年霑益女土官安素儀無嗣奏
以土知府祿墨次子繼本州即安紹慶也已祿墨及長
子安雲龍與兩孫俱歿安紹慶奏以次子安効良歸宗

襲土知府安雲龍之妻隴氏即鎮雄女土官者氏之女也。以雲龍雖故尚有遺孤且挾外家兵力與紹慶為敵。紹慶則以隴氏所出明係假子亦倚靈益兵力與隴氏為難。彼此仇殺流毒一方士民連名上奏事行兩省會勘。歷十有四年不結。是年安雲翔奏稱隴氏有子官保。今已長成。効良倚父兵強。圖竊據殺戮無辜。因極言効良不可立者數事。三十九年廷臣議行川貴大吏勘報。貴州撫臣以土官爭職在雲南而為害在黔蜀。必得三

省會勘始可定獄帝命速勘乃命隴鶴書承襲鎮雄土
知府鶴書原名阿卜自其始祖隴飛沙獻土歸順授為
世職知府五傳而為庶魯卜別居於果利地又四傳而
為庶祿姑別居夷良七欠頭地又五傳而隴氏之正支
斬矣水西安堯臣贅於祿欲奄有之衆論不平始有驅
安立隴之奏奉旨察立隴後女官者氏以阿固應阿固
者魯卜之六世孫而易名隴正名者也於是主立阿固
而先立其父阿章章尋病死阿固不為夷衆所服往復

察勘者氏及四十八日十五火頭等共推阿卜阿卜者
祿姑之五世孫咸以為長且賢而者氏且以印獻遂定
立阿卜而以阿固充管事從巡撫喬應星之議也四十
一年烏撒土舍安効良初與安雲翔爭立朝廷以嫡派
立効良雲翔數為亂謀遂効良焚劫烏撒四川撫按上
其事以効良為雲龍親姪雲翔乃其堂弟親踈判然効
良自當立雲翔擾害地方欺罔朝廷罪原難赦但為奸
人指使情可原姑准復冠帶從之四十三年雲南巡按

吳應琦言東川土官祿壽祿哲爭襲以來各縱部衆越境劫掠擁衆千餘剽掠兩府浹旬之間村屯竝掃荼毒未有如此之甚者或撫或勦毋令養禍日滋下所司勛奏貴州巡按御史楊鶴言烏撒土官自安雲寵物故安咀與安効良爭官奪印仇殺者二十年夷民無統盜寇蜂起堡屯焚燬行賈梗絕者亦二十年是爭官奪印者蜀之土官而蹂踐糜爛者黔之赤子誠改隸於黔則彈壓既便干戈可戢又言烏撒者滇蜀之咽喉要地臣由

普安入滇七日始達烏撒見効良之父安紹慶據霑益當曲靖之門戶効良據烏撒又扼滇蜀之咽喉父子各據一方且壤地相接無他郡縣上司以隔絕鈐制之將來尾大不掉實可寒心蓋黔有可制之勢而無其權蜀有遙制之名而無其實誠以為隸黔中便帝命所司速議泰昌元年雲南撫按沈敬炳等言蜀之東川業奉朝命兼制然事權全不相關祿千鍾祿阿伽縱賊披猖為患不已是東川雖隸蜀而相去甚遠雖不隸滇而禍實

震隣宜特敕蜀撫按凡遇襲替務合兩省會勘蜀察其

世次滇亦按無侵犯方許起送亦羈縻綏靜之要術也

詔下所司時諸土司皆桀驁難制烏撒東川烏蒙鎮雄

諸府地界復相錯於川滇黔楚之間統轄既分事權不

一往往軼出為諸邊害故封疆大吏紛紛陳情冀安邊

隅而中樞之臣動諉勘報彌年經月卒無成畫以致疆

事日壞播州初平永寧又叛水西煽起東川烏蒙鎮雄

皆觀望騎牆心懷疑貳於是安効良以烏撒首附逆於

邦彥并力攻陸廣復合霑益賊圍羅平陷霑益為雲南
巡撫閱洪學所敗洪學以兵力不繼好語招之令禽賊
自贖効良亦佯為恭順又見黔師出陸廣滇師出霑益
水烏之勢已成騎虎遂合永寧水西諸部三十六營直
抵霑益對壘城下五日副總兵袁善宣撫使沙源等督
將士力戰出奇兵破之効良敗死妻安氏無子妾設白
生其爵其祿二婦素不相能安氏居鹽倉設白母子居
抱渡安氏遂代効良為土官然亦未絕其爵其爵亦以

安氏為安位姐不敢抗宗禎元年四川巡撫差官李友芝齋冠帶獎賞其爵母子令管烏撒安氏惡分始絕其爵其爵夜襲安氏鹽倉不克與設白其祿逃東川界為東川所拒而抱渡又失李友芝為請於制府發滇兵三千援其爵滇撫不應安氏懼謀迎霑益土官安邊為婚授之烏撒以拒其爵安邊亦欲偶安氏以拒其祿以催糧為名至建昌安氏遂迎邊至鹽倉成婚一時皇皇謂水西必糾霑烏入犯雲南巡撫謝存仁以聞存仁因移

鎮曲靖以觀變安邊安氏請復烏撒衛以自贖二年總督朱燾元調集漢土兵列營霑益趣滇撫會兵進烏撒境安邊安氏逃避偏橋大兵入鹽倉拔難民一千餘人師還安邊安氏復還鹽倉遣人至軍前請俟烏城克復束身歸命意實緩師乃復發兵逐安邊安氏以鹽倉授其爵兵至望城坡遇賊哨騎百餘麾兵奮擊賊盡奔箐中遂復烏撒城安邊駐三十里外擁兵求見諭令束身歸誠邊夜遁遂棄鹽倉入九龍困烏撒陷賊八年至是

始復乃召其爵來鹽倉令約束九頭目以守且令圖獻
安邊安氏其爵以鹽倉殘燬乞移烏撒城從之時其爵
署烏撒知府其祿署霑益知州雖懦稚頗忠順其母亦
頗有主持能得衆安邊屢乞降於總督朱燮元且藉水
西安位代申以邊實紹慶嫡孫宜襲知州請罪其爵其
祿燮元曲為調護欲予以職銜分烏撒安置之雲南撫
按堅執不可以安邊令其黨勒兵於野馬川復以千金
誘其爵頭目日為并吞霑烏計萬一其爵被襲則烏撒

失而前功盡棄烏撒失霑益危而全滇動搖非但震隣
實乃切膚竟不行安邊乃乞師於安位納之霑益而逐
其祿時安氏在也既而安氏死安位與之貳其祿乃假
手羅彩令者布發難邊徼死不移日其祿率兵至詭言
為其叔報仇士民歸者如流於是其祿復有霑益而廟
堂之上方急流寇不復能問云

馬湖漢牂牁郡內地也有龍馬湖因名焉唐為羈縻州
四總名馬湖部洪武四年冬馬湖路總管安濟遣其子

仁來歸附詔改馬湖路為馬湖府領長官司四曰泥溪
曰平夷曰蠻夷曰沐川以安濟為知府世襲六年安濟
以病告乞以子安仁代職詔從之自是三年一入貢七
年馬湖知府珉德遣其弟阿穆上表貢馬廷臣言洪武
四年大兵下蜀珉德叔安濟遣子入朝朝廷授以世襲
知府恩至渥矣今珉德既襲其職不自來朝而遣其弟
非奉上之道帝却其所貢馬十二年珉德貢香楠木詔
賜衣鈔十六年珉德來朝獻馬十八匹賜衣一襲米二

十石鈔三十錠永樂十二年泥溪平夷蠻夷沐川四長
官司遣人貢方物賜鈔幣宣德八年平夷長官司奏比
者火延公解凡朝廷頒降榜文倉庫稅糧錢帛及案牘
皆赦免乞宥罪并獻馬二匹帝曰遠蠻能恭謹畏法如
此置不問正統二年泥溪土官醫學正科田璣盜官藏
絲鈔援永宣時例邊夷有犯聽以馬贖許之三年免馬
湖府舉人王有學充吏先是有學會試過期不至例充
吏有學原籍長官司因遣通事貢馬乞宥罪仍肄習太

學許之弘治八年土知府安鼈有罪伏誅鼈性殘忍虐民計口賦錢歲入銀萬計土民有婦女多淫之用妖僧百足魘魅殺人又令人殺平夷長官王大慶大慶聞而逃乃殺其弟為橫二十年巡按御史張鸞請治之得實伏誅遂改馬湖府為流官知府

建昌衛本印都地漢武帝置越雋郡隋唐皆為雋州至德初沒於土番貞元中收復懿宗時為蒙詔所據改建昌府以烏白二蠻實之元至元間置建昌路又立羅羅

斯宣慰司以統之洪武五年羅羅斯宣慰安定來朝而

建昌尚未歸附十四年遣內臣齎敕諭之乃降十五年

置建昌衛指揮使司元平章裕嚕特穆爾等自雲南建

昌來貢馬一百八十匹并上元所授符印詔賜裕嚕特

穆爾綺衣金帶鞞襪家人綿布一百六十疋鈔二十四

百四十錠以裕嚕特穆爾為建昌衛指揮使月給三品

俸贍其家十六年建昌土官安配及土酋阿派先後來

朝貢馬及方物皆賜織金文綺衣帽鞞襪十八年裕嚕

特穆爾舉家來朝請遣子入學厚賜遣之二十一年建昌府故土官安思正妻師克等來朝貢馬九十九匹詔授師克知府賜冠帶襲衣文綺鈔錠因命師克討東川芒部及赤水河叛蠻二十三年安配遣子僧保等四十二人入監讀書二十五年致仕指揮安配貢馬詔賜配及其把事五十三人幣鈔有差已而裕魯特穆爾反合德昌會川迷易柏興印部并西番土軍萬餘人殺官軍男婦二百餘口掠屯牛燒營屋劫軍糧率衆攻城指揮

使安的以所部兵出戰敗之斬八十餘級禽其黨十餘人賊退屯阿宜河轉攻蘇州指揮僉事魯毅率精騎出西門擊之賊衆大集毅且戰且却復入城拒守賊圍城毅乘間遣壯士王旱突入賊營斫賊賊驚遁於是置建昌蘇州二軍民指揮使司及會州軍民千戶所調京衛及陝西兵萬五千餘人往戍之仍諭將士互相應援設伏出奇并諭禽賊首獻者賞千金復諭總兵官涼國公藍玉以裕魯特穆爾詭詐不可信其降致緩師養禍四

川都指揮使瞿能率各衛兵至雙狼寨禽偽千戶段太平等賊衆大潰裕魯特穆爾敗遁能督兵追捕攻托落寨拔之轉戰而前進至打冲河三里所與裕魯特穆爾遇大戰又敗之俘其衆五百餘人溺死者千餘獲牛馬無算官軍入德昌能遂調指揮同知徐凱分兵入普濟州搜捕復駕橋於打冲河遣指揮李華引兵追托落寨餘孽進至水西斬裕魯特穆爾把事七人其截路寨土蠻長沙納的皆中天死能還攻天星卧漂諸寨皆克之

先後俘殺千八百餘人裕魯特穆爾遁入柏興州帝遣諭藍玉曰裕魯特穆爾信其逆黨達勒達楊把事等或遣之先降或親來覘我不可不密為防其柏興州賈哈喇境內麼些等部更須留意賈哈喇者麼些洞土酋也初王師克建昌授以指揮之職自是從裕魯特穆爾叛玉率兵至柏興州遣百戶毛海以計誘致裕魯特穆爾并其子胖伯遂降其衆送裕魯特穆爾京師伏誅玉因奏四川地曠山險控扼西番松茂碉黎當土番出入之地

馬湖建昌嘉定俱為要道皆宜增屯衛報可命玉班師
二十七年麼些洞蠻寇打冲河西守堡都督徐凱擊敗
之二十九年威龍土知州普習叛普習裕嚕持穆爾妻
兄也官軍捕之普習中流矢死三十一年徐凱等平卜
木瓦寨執賈哈喇送京師誅之寨地峻險三面陡絕下
臨大江江流悍急不可行舟惟一道僅可通人行官軍
至輒自上投石不得進凱乃斷其汲道困之寇窮促凱
督將士抵其寨力攻破之遂就禽因改建昌路為建昌

衛置軍民指揮使司安氏世襲指揮使不給印置其居於城東郭外里許所屬有四十八馬站大頭土番楚人子白夷麼些狽獾裸獾韃靼回紇諸種散居山谷間北至大渡南及金沙江東抵烏蒙西訖鹽井延袤千餘里以昌州普濟威龍三州長官隸之有把事四人世轄其衆皆節制於四川行都指揮使司西南土官安氏殆為稱首配六世孫安忠無後妻鳳氏管指揮使事鳳氏死族人安登繼襲復無子妻瞿氏管事以族人世隆嗣世

隆復無子繼妻祿氏管事祿死以族姪安崇業嗣崇業
與祿氏不相能因養那固為假子其奴祿祈從史構難
歲仇殺鎮巡官讞之殺那固而戍祿祈事遂平安氏所
轄四驛曰祿馬阿用白水瀘沾各百里有差其涼山拖
郎桐槽熱水諸番則以強弱為向背所領昌州等三長
官司皆在衛東西南三百里內洪武十八年土官盧尼
姑吉撒加白氏等歸附皆令世襲為知州裕嚕特穆爾
之亂諸州皆廢革永樂元年復置悉改為長官司仍隸

建昌其千戶所之隸於衛者有三曰禮州曰打冲河曰

德昌禮州漢蘇示縣打冲河唐沙野城德昌元定昌路

也 寧番衛元時立於印都之野曰蘇州洪武間土官

怕兀它從裕嚕特穆爾為亂廢州置衛二十七年改寧

番衛西番種故名寧番有冕山千戶所 越雋衛漢邛

都及闡二縣地有奴諾城即蜀漢時諸葛亮征蠻所築

以憇軍者也元置邛部安撫招討司已改邛部州洪武

中嶺真伯以招討使來歸因改為邛部軍民州洪武十

五年置越爲軍民指揮使司於印部州命指揮僉事李質領謫戍軍士守之二十六年置越舊衛永樂元年改邛部爲長官司隸越舊衛萬歷中土官嶺柏死孽子應昇負印去柏妾沙氏爭之不得土目阿堆等擁沙氏焚利濟站廬舍擁兵臨城總兵劉顯率兵往撫之沙氏悔禍殺阿堆等自贖顯遂以印授之後沙氏淫於族人阿祭印復為昇所奪祭死其子嶺鳳起嗾他番刺殺應昇鎮守官因平蠻之師誘鳳起繫之收其印而誅從鳳起

為亂者百餘人印無所歸緘於庫部衆無統肆行為盜
普雄部衆姑咱等乘勢蜂起郵傳不通遠近震恐十五
年鎮巡官會師討之斬馘千數鳳起病死其衆爭歸附
因置平夷歸化二堡以居之有鎮西千戶所 鹽井衛
古定符縣也元初為落蘭部至元中於黑白鹽井置門
鹽縣於縣置柏興府洪武中改為柏興千戶所旋改鹽
井衛又於二井置鹽課司永樂五年設馬刺長官司其
村落多白夷居之長官世阿氏洪武時歸附授世職地

接雲南北勝州稱庶富人亦擾馴打冲河守禦中左千
戶所其土千戶刺兀於洪武二十五年征賈哈喇效順
來歸其子刺馬非復貢馬赴京授本所副千戶永樂十
一年陞正以別於四所地與麗江永寧二府隣麗江土
官木氏侵削其地幾半 會川衛越嵩之會無縣也唐
上元中移邛都縣於會川鎮以川原竝會故名宋屬大
理為會川府元置會川路治武安州隸羅羅斯宣慰司
洪武十七年會川土同知馬誠來朝復立會川府領武

安永昌麻龍等州二十六年革會川府初裕嚕特穆爾
反土知府王春陷會川燬民居府治至是遂墮其城尋
改為會川衛軍民指揮使司領迷易千戶所土官賢姓
其先雲南景東僂種也徙其屬來田種洪武十六年歸
附以隨征東川芒部勞授世襲副千戶居所治城外所
轄僂蠻僅八百戶

茂州古冉駝國地漢武帝置汶山郡宣帝為北都都尉
隋為蜀州尋改會州唐貞觀改茂州宋元仍舊治汶山

縣洪武六年茂州權知州楊者七及隴木頭靜州岳希
蓬諸土官來朝貢十一年置茂州衛指揮使司時四川
都司遣兵修灌縣橋梁至陶關汶川土酋孟道貴疑之
集部落阻陶關道都司遣指揮胡淵童勝等統兵分二
道擊之一由石泉一由灌口由灌口者進次陶關蠻衆
伏兩山間投石崖下兵不能進適汶川土官來降得其
間道乃選勇士捲旗甲乘夜潛出兩山後遲明從山頂
張旗幟發火礮蠻驚潰師進雁門關道險蠻復據之乃

駐平野得小舟渡至龍止鐵冶寨擊破之其由石泉者
次泥池蠻悉衆拒千戶薛文突陣射却之士卒奮擊大
敗其衆兩軍遂會於茂州楊者七迎降以者七仍領其
州乃詔立茂州衛留指揮楚華將兵三千守之十五年
者七陰結生番約日伏兵陷城有小校密告於官遂發
兵捕斬者七生番不之覺如期入寇官軍掩擊敗之於
是盡徙羌民於城外正德二年太監羅籛奏茂州所轄
卜南村曲山等寨乞為白人願納糧差其俗以白為善

以黑為惡禮部覆番人向化宜令入貢給賞從之十四年巡撫馬昊調松潘兵攻小東路番寨而茂州核桃溝上下關番蠻懼遂糾白石羅打鼓諸寨生番攻圍城堡游擊張傑敗績十五年巡撫盛應期奏綽頭番犯松州總兵張傑克之復犯雄溪屯指揮杜欽敗之烟宗等寨皆降萬曆十九年威茂諸番作亂攻破新橋乘勢圍普安等堡四川巡撫李尚忠檄諸路兵追剿過河普安諸堡得以保全茂州地方數千里自唐武德改郡會川領

羈縻州九前後皆蠻族向無城郭宋熙寧中范百常知茂州民請築城而蠻人來爭百常與之拒且戰且築城乃得立自宋迄元皆為羌人所據不置州縣者幾二百年洪武十一年平蜀置疊溪右千戶所隸茂州衛而置威茂道開府茂州分游擊以駐疊溪規防始立然東路生羌白草最強又與松潘黃毛韃相通出沒為寇相沿不絕云其通西域要路為挑坪即古挑關也有繩橋渡江守挑坪者為隴木司茂州長官司三日隴木曰靜州

日疊溪隴木長官司其長官即隴木里人也洪武時歸
附授承直郎世襲長官歲貢馬二匹所屬玉亭神溪十
二寨俱為編氓有保長統之靜州長官司其地即唐之
悉唐縣其長官亦靜州里人也襲官貢馬與隴木同正
德間與岳希蓬節孝為亂攻茂城斷水道七日節孝弟
車勺潛引水以濟我軍事平使車勺襲職轄法虎核挑
溝八寨俱編戶為氓亦有保長統之疊溪千戶所永樂
四年置領長官司二日疊溪在治北一里日鬱即在治

西十五里疊溪郁氏洪武十五年歸附給印世襲凡三年貢馬四匹長官所轄河東熟番八寨皆大姓及馬路小關七族其土舍轄河西小姓六寨地土廣遠饒畜產稗麥路積人皆臬黠名雖熟番與生番等鬱即長官噉保萬曆十八年與黑水松坪稱兵攻新橋明年伏誅漢關墩附近諸小姓舊屬鬱即至是改屬疊溪初都督方政平歷日諸寨設長寧安撫司隸松潘至正統元年總兵蔣貴言其遼闊亦改隸於疊溪守禦千戶

松潘古氏羌地西漢置護羌校尉於此唐初置松州都督廣德初陷於吐蕃宋時吐蕃將潘羅支領之名潘州元置吐蕃宣慰司洪武十二年命平羌將軍御史大夫丁玉定其地敕之曰松潘僻在萬山接西戎之境朕豈欲窮兵遠討但羌戎屢寇邊征之不獲已也今捷至知松州已克徐將資糧於容州進取潘州若盡三州之地則疊州不須窮兵自當來服須擇士勇者守納都疊溪路其驛道無阻過者不可守也來降諸戎長必遣入朝

朕親撫諭之遂併潘州於松州置松州衛指揮使司丁
玉遣寧州衛指揮高顯城其地十三年帝以松州衛遠
在山谷屯種不給餽餉為難命罷之未幾指揮耿忠經
略其地奏言松州為番蜀要害地不可罷命復置十四
年置松潘等處安撫司以龍州知州薛文勝為安撫使
秩從五品又置十三族長官司秩正七品曰勒都曰阿
昔洞曰北定曰牟力結曰略匝曰祈命曰山洞曰麥匝
曰者多曰占藏先結曰包藏先結曰班班曰白馬路其

後復隸松潘者長官司四曰阿思曰思囊兒曰阿用曰
潘幹寨安撫司四曰八郎曰阿角寨曰麻兒匝曰芒兒
者後又以思曩日安撫司附馬諸長官司每三年入貢
賞賜如例十五年占藏先結等土酋來朝貢馬一百三
匹詔賜綺鈔有差十六年耿忠言臣所轄松潘等處安
撫司屬各長官司宜以其戶口之數量其民力歲令納
馬置驛而籍其民充驛夫供徭役從之既而松潘羌民
作亂官兵討平之覓松州及疊溪城十七年松潘八積

族老虎等寨蠻亂官兵擊破之獲馬一百二十犏牛三

百犛牛五百九十景川侯曹震請擇良馬貢京師餘給
軍其犏牛犛牛非中國所畜令易糧餉犒軍從之十八
年松州羌反成都衛指揮成信等率兵攻其牟力等寨
破之兵還又遇賊三千人於道復擊敗之追至乞刺河
乃還二十年改松州衛為松潘等處軍民指揮使司改
松潘安撫司為龍州二十一年采貢生番則路南向等
引草地生番千餘人寇潘州阿昔洞長官司殺傷人口

指揮周助率馬步軍同松潘衛軍討之番寇率衆迎戰
千戶劉德破之斬首三十四級獲馬三十餘匹賊潰渡
河四十餘里復收敗卒屯聚指揮周能追擊之斬首一
百三十餘級獲馬六十餘匹溺死甚衆羣番遠遁二十
六年西番思曩日等族來歸進馬百三十匹命給金銅
信符并賜文綺襲衣宣德二年麻兒匝順化喇嘛著八
議卜來歸置麻兒匝安撫司以喇嘛著八讓卜為安撫
麻兒匝在阿樂地去松潘七百餘里初著八讓卜時侵

掠邊民及遮八郎安撫司朝貢路松潘衛指揮吳瑋遣人招之因遣其姪完卜來貢獻言其地廣民衆過於八郎請置宣撫司以轄之帝命置安撫遣敕諭之四川巡按等奏松潘衛所轄阿用等寨蠻寇擁衆萬餘傷敗官軍請討之帝意邊將必有激之者既四川都司奏至言並非番寇實由千戶錢宏因調發松潘官軍往征交趾衆憚行宏詭言番寇至當追捕冀免調又領軍突入麥匣諸族逼取牛馬致番人忿怨復以大軍將致討懾之

番衆驚潰約黑水生番為亂帝命逮宏等而責諸司怠
玩邊務亟捕諸傷官軍者遣都指揮僉事蔣貴往同松
潘衛指揮吳瑋招撫番寇令調附近諸衛軍二萬人以
行時賊圍松潘疊溪茂州斷索橋官軍與戰皆敗出掠
緜竹諸縣官署民居皆被焚燬鎮撫侯璉死之蜀王遣
護衛官校七十人來援命都督陳懷與指揮蔣貴等合
師亟討之而梟宏於松潘以徇并竄諸將之貪淫玩寇
者三年陳懷等率諸軍屢敗賊於圪答壩葉崇闢奪永

鎮等橋復疊溪撫定祁命等十族又招降渴卓等二十

餘寨松潘平八年八部安撫司及思囊兒十四族朝貢

之使陞辭令齎敕還諭其土官俾約束所轄蠻民安分

循理毋作過以取罪戾九年敕指揮僉事方政蔣貴等

撫剿松潘政等至榜諭禍福威茂諸衛俱聽命惟松潘

疊溪所轄任昌巴猪黑虎等寨梗化政令指揮趙得官

聚等以次進兵平龍溪等三十七寨班師還命蔣貴佩

征蠻將軍印鎮守松潘十年貴奏比因番人不靖松潘

疊溪諸處倉糧支銷殆盡別無儲積帝命戶部於四川
歲運之數量益二分給之正統三年巖州長官司讓達
作亂侵雜道諸邊雜道長官安白訴於朝帝命四川三
司往諭之皆歸服四年松潘指揮趙得奏祁命族番寇
商巴作亂官軍捕禽之其弟小商巴復聚浦江新塘等
關據險劫掠乞發大軍剿除帝命李安充總兵官王翱
叅贊軍務調成都左衛官軍及松潘土兵合二萬人征
之已翱知商巴為都指揮趙諒所陷乃按誅諒而釋商

巴等事遂已九年松潘指揮僉事王杲奏比者黑虎等寨番蠻攻圍椒園松溪等關堡殺傷官民欲行禽剿恐各寨驚疑應諭能禽賊者重賞之報可十五年黑虎寨賊首多兒太伏誅初多兒太掠茂州境為官軍所獲誠而釋之未幾復糾諸寨入掠帝命序班祁全往諭諸寨禽多兒太至京梟其首十一年以寇深為僉都御史提督松潘兵備時松潘皆已向化惟歪地骨鹿族二十寨不服命督高廣王杲等剿之設思曩日安撫司以阿思

觀為之使隸松潘衛先是阿思觀父端葛洪武中歸順
給金牌撫番至阿思觀又能招撫故有是命景泰三年
鎮守松潘刑部左侍郎羅綺等奏雪兒卜寨賊首卓時
芳等烟崇寨賊首阿免結等累年糾合於安化關劫掠
臣會師抵其巢穴斬首不計其數生禽卓時芳阿免結
等梟斬於市七年提督松潘羅綺復奏松潘土番王永
習性兇獷嘗殺其土官高茂林男婦五百餘口及故土
官董敏子伯浩等二十餘人今又糾合番蠻攻劫地方

臣與指揮周貴等統領官軍直抵桑坪已將永等誅滅邊境肅清降敕褒賞天順五年番衆入龍安石泉等處擾糧道六年敕松潘總兵許貴曰叙州蠻賊出沒為患比松潘尤甚其馳往會剿貴聞命會兵叙州追討昔乖件莫洞都夜三寨分兵兩哨克硬寨四十餘斬首一千一百餘級成化二年鎮守太監閻禮奏松茂疊溪所轄白草壩等寨番羌聚衆五百人越龍州境剽掠白草番者唐吐蕃贊普遺種上下凡十八寨部曲素強恃其險

阻往往剽奪為患四年禮復奏白草諸番擁衆寇安縣
石泉諸處因各軍俱調征山都掌蠻致指揮王璟備禦
不謹命副總兵盧能剿之能遣指揮閻斌巡邊至廟子
溝番賊三百突至殺傷相當斌以失機逮治九年巡撫
夏埏奏黑虎寨賊首夜合等劫攻闕堡左叅將宰用兵
備副使沈琮督兵馳詣松溪堡敗之斬獲夜合等三十
六級松潘指揮僉事堯彘奏臣與兵備沈琮分剿白馬
路水土茹兒等番寨大克之弘治二年松潘番寇殺傷

平夷堡官軍命逮指揮以下各官治之三年免思曩日
安撫等十六族明年朝覲以守臣言其地方災傷也七
年松潘空心寨番賊犯邊都指揮僉事李鎬敗之十三
年番賊入犯松潘壩州坡抵闕勢益熾命逮指揮湯綱
等而敕巡撫張瓚調漢土官兵五萬由東南二路分剿
破白羊嶺鵠飲溪等三十一寨斬四百餘級商巴等二
十六族皆納款十四年復攻黃頭青水諸寨前後殺獲
男婦七百餘人赍其碉房九百墜崖死者不可勝計諸

番稍靖正德元年巡撫劉洪奏祈命族八長官司所攝
番衆多至三十寨少亦二十餘寨環布松潘兩河其土
官已故子孫自應承襲令宜察勘有原降印信者方許
覈報可十六年松潘衛熟番八大襍等作亂同知杜欽
平之嘉靖五年命都督僉事何卿鎮守松潘時黑虎五
寨及烏都鶻鴿諸番叛卿次第平之降者日至卿有威
望在鎮十七年松潘以寧二十三年以北警召卿入衛
繼之者李爵高岡鳳未幾皆為巡撫劾罷二十六年復

命卿往鎮時白草番亂卿會巡撫張時徹討禽渠惡數人俘斬九百七十餘級克營寨四十七毀碉房四千八百獲馬牛器械儲積無算終嘉靖世松潘鎮號得人邊境安堵焉初龍州薛文勝於洪武六年來降命仍知龍州既置松潘安撫司命文勝為安撫使既置松州衛仍以松潘為龍州宣德九年陞龍州為宣撫司以土知州薛忠義為宣撫使龍州者漢陰平道也宋景定間臨邛進士薛巖來守是州捍衛有功得世襲自文勝歸附其

部長李仁廣王祥皆輸糧餉有功亦得世襲及宣德中以征松潘功陞州為宣撫使仁廣為副使祥為僉事各統兵五百世守白馬白草木瓜番地至嘉靖四十四年宣撫薛兆乾與副使李蕃相仇訐兆乾率眾圍執蕃父子毆殺之撫按檄兵備僉事趙教勘其事兆乾懼與母陳氏及諸左右糾白草番眾數千人分據各關隘拒命絕松潘餉道脅僉事王華不從屠其家居民被焚掠者無算是年春與官軍戰不利求救於上下十八族番蠻

皆不應兆乾率其家屬奔至石壩官軍追及之就禽四十五年兆乾伏誅籍其家母及其黨二十二人皆以同謀論斬餘黨悉平遂改龍州宣撫司為龍安府設立流官如馬湖而割保寧之江油成都之石泉二縣分隸之萬曆八年雪山國師喇嘛等四十八寨勾北邊部落為寇圍漳臘守備張良賢破之犯鎮盧百戶杜世仁力戰城得全世仁死焉又犯制臺良賢復擊之追至思答弄連戰大破之火落赤之姪小王子死焉十九年巡按李

化龍言松潘為四川屏蔽疊茂為松潘咽喉番戎作梗
松潘力不能支宜移四川總兵於松潘以備防禦是時
疊茂諸番衆糾結為亂鎮巡官率兵剿之俘馘八百餘
級番寇亦斬其部長黑卜白什等獻功贖罪而松坪諸
惡屯據大雪山頂諸將卒搜討亦有斬獲以捷聞遂設
平武縣於龍安府松潘以孤城介絕域寄一綫饋運路
於龍州制守為難洪武時欲棄者數以形勝扼險不可
罷乃內修屯務外輯羌戎因俗拊循擇人為理番衆相

安者垂四十餘年及宣德初調兵啟釁致動干戈自是
置鎮建牙宿重兵以資彈壓亦時服時叛自漳臘以北
即為大荒斯籌邊者之所亟圖也

天全古氐羌地五代孟蜀時置碉門黎雅長河西魚通
寧遠六軍安撫司宋因之隸雅州元置六安撫司屬土
番等處宣慰司後改六番招討又分置天全招討司明
初并為天全六番招討司隸四川都司洪武六年天全
六番招討使高英遣子敬嚴等來朝貢方物帝賜以文

綺龍衣以英為正招討楊藏卜為副招討秩從五品每
三歲入貢賜予甚厚二十一年楊藏卜來朝言茶戶向
與西番貿易歲收其課近在官收買額遂虧乞從民便
許之先是高敬巖襲招討使偕楊藏卜奏請簡土民為
兵以守邊境詔許之敬巖等遂招選土民教以戰陣得
馬步卒千餘人至是藏卜來朝奏其事詔更天全六番
招討司為武職令戍守邊界控制西番三十一年帝諭
左都督徐增壽曰曩因碣門距長河西口道路險隘以

致往來跋涉艱難市馬數少今聞有路自碣門出拓木
場徑抵長河西口通雜道長官司道路可平坦往來徑
直可即檄所司開拓以便往來永樂二年高敬讓來朝
并賀立皇太子且遣其子虎入國子學賜虎衣衾等物
十年敬讓遣子虎貢馬初虎入國學讀書以丁母憂去
至是服闋還監皇太子命禮部賜予如例宣德五年六
番招討司奏舊額歲辦烏茶五萬斤二年一次運付碣
門茶馬司易馬令戶部令再辦芽茶二千二百斤山深

地瘠艱於采辦乞減其數帝令免烏茶只辦芽茶十年
命高鳳署天全六番招討司事先是敬讓以罪下獄死
至是其子鳳乞襲父職帝念其祖有撫綏功命暫理招
討事正統四年命鳳襲正德十五年招討高文林父子
稱兵亂副招討楊世仁亦助惡命四川撫按官討之初
文林等與蘆山縣民爭田構釁知縣處置失宜致叛亂
踰年討斬文林禽其子繼恩擇其宗人承襲初天全招
討司治碣門城元之碣門安撫司也在雅州境明初宣

慰余思聰王德貴歸附始降司為州設雅州千戶所而設碉門百戶近天全六番之界又置茶課司以平互市蓋其地為南詔咽喉三十六番朝貢出入之路三十六番者皆西南諸部落洪武初先後至京授職賜印立都指揮使二曰烏斯藏曰朶甘為宣慰司者三曰朶甘曰董卜韓湖曰長河西魚通寧遠為招討司者六為萬戶府者四為千戶所者十七是為三十六種或三年或五年一朝貢其道皆由雅州入詳西蕃傳

黎州漢沈黎郡地史記稱越嶲以東北君長以十數笮
都最大自唐蒙通夜郎邛笮之君請為內臣因置笮都
縣復曰旄牛縣元鼎中以為沈黎郡唐割雅嶲二州置
黎州天寶初改為洪源郡尋改漢源宋屬成都路元屬
土番等處宣慰司洪武八年省漢源縣置黎州長官司
以為德為長官德雲南人馬姓祖仕元世襲邛部州六
番招討使明氏據蜀德兄安復為黎州招討使明氏亡
蠻民潰散德奉母還居邛部至是四川布政司招之德

遂來朝貢馬請置長官司詔以德為黎州長官賜印及衣服綺帛十一年陞為黎州安撫司即以德為使十四年德遣使貢馬詔賜德鈔五十四錠文綺七疋自是三年一入貢弘治十四年命黎州安撫隸四川都司萬曆十九年安撫馬祥無後妻瞿氏掌司事取瞿姓子撫之將有他志祥姪土舍居松坪者遂興兵攻城奪印番衆乘機剽掠時叅將吳文傑方有征東之役移師剿平之二十四年降黎州安撫司為千戶所立所治於司南三

十里大田山壩分上七枝編戶屬大渡河十戶所下七枝仍屬松坪馬氏約束松坪在司之東南自炒米城直接峨嵋高山峻坂三百餘里皆安撫族人居之黎雅諸蠻宋時屢為邊患明興以諸蠻皆天全六番諸部散居於二州之境遂於黎州設安撫於天全六番設招討以示羈縻而雅州所屬與招討所轄之蠻民境土相連時有爭訟徼外大小木瓜種分三枝臚乃卜最强世居西河初屬馬湖土官安氏鈐轄自馬湖改流諸瓜叛入邛

部歸嶺氏其地自西河至涼山雪山諸處周圍蟠據嘉靖末諸爪畜牧蕃盛時窺邊邛部長官嶺柏不能制嘉峨捷為諸邊皆為侵擾鎮巡官督邛部兵捕之爪兵益熾乃議大征分建昌越舊馬湖三路兵進討爪部始惶駭請降願歲貢馬方物乃定其地四千八百四十餘畝徵糧四百四十餘石輸峨眉縣明初與安撫司同置者有大渡河守禦千戶所唐時河平廣可通漕戍將一不守則黎雅邛嘉成都皆動搖宋建隆三年王全斌平蜀

以圖來上議者欲因兵威復越嵩藝祖以玉斧畫圖曰
外此吾不有也自是之後河中流忽陷下五六丈水
至此洶湧如空中落船筏不通名為噎口殆天設險以
限內外云

明史卷三百十一

欽定四庫全書

明史卷三百十一考證

烏蒙傳時征南將軍傅友德已分遣都督胡海洋等帥師五萬由永寧趨烏撒

臣章宗瀛按都督郭英等

出永寧路多險阻諸將欲深入英曰破敵貴先聲攻取必自近始舍近趨遠非策之上也遂以兵攻赤水河去河二十里為營時久雨水暴漲英曰賊恃水漲不意我濟下令諸軍斬木造筏夜半濟比曉敵始覺

遂大驚潰見通鑑紀事謹附考

烏蒙傳諸夷種類皆出於獠獮臣章宗瀛按獠獮本

名盧盧有黑白二種其先漢時從諸葛亮破孟獲封
羅甸王世長其土共為諸苗之寇見尚谿織志謹附
考

烏蒙傳宜亟趣都御史王廷相之任臣章宗瀛按川

撫王廷相同何卿進勦土官阿濟稱沙保已死廷相
據聞既而御史施山總兵牛桓言沙保未死河濟言

不實文唐鳳儀新任乃專責阿濟使之擒沙保斬於
軍門見靈司合志傳未載謹附考

烏蒙傳於是四川巡撫唐鳳儀言烏蒙烏撒東川諸土
官故與芒部為唇齒 臣章宗瀛按八年四川巡撫

唐鳳儀巡按戴金會奏議處芒部七事一曰因地方
以定土流二曰順夷情以續絕世三曰尊威令以示
懲戒四曰存四司以專責任五曰明賞罰以定夷情
六曰嚴守備以塞禍流七曰下重令以戒聯結見實

錄謹附考

馬湖府傳宏治八年土知府安鼇有罪伏誅 臣章宗

瀛按嘉靖二年馬湖土巡檢安宇自言從征年久累
獲首功奏乞改駐職官兵部覆宇本安鼇之子法當
安置廣西因四川用兵雖有功例應給賞而宇故辭
之陰為開復土官之地則先朝岑猛岑濬事可鑒也
上遂不許見蠻司念志謹附考

建昌衛傳裕嚕特穆爾之亂諸州皆廢革永樂元年復

置 臣章宗瀛按地里志永樂二年改置昌州威龍
普濟三長官司此作元年與地里志異謹識

寧番衛傳二十七年改寧番衛 臣章宗瀛按禮州屬

建昌衛見上建昌衛傳中鎮西屬越舊衛見下越舊
衛傳中地里志亦言寧番衛領千戶所一止有冕山
舊本誤將鎮西禮州混入自相牴牾謹據統志改

越舊衛傳漢邛都及闡二縣地 臣章宗瀛按漢書地
里志有闡縣而無闡縣舊本誤闡謹據改

茂州衛傳茂州地方數千里自唐武德改郡會州 臣

章宗瀛按茂州隋為會州為改州為汶山郡唐武德
元年復曰會州四年改曰南會州舊本州誤川謹據
改

茂州衛傳靜州長官司 臣章宗瀛按靜州宋時鑿董
姓者據其地號靜州鑿明置長官司岳希亦有長官
司俱洪武七年置見統志謹識

松潘衛傳十年黑虎寨賊首多兒太伏誅 臣章宗瀛

舊本誤作十一年按多兒太伏誅係正統十年傳作十五年誤且於下文十一年三字亦不合據明實錄謹改並於下文添一字以符勻刻

松潘衛傳二十六年復命何卿往鎮

臣章宗瀛按卿

以功進都督同知卿素有威望為番人所憚自茂迄松潘龍安夾道築牆數百里行李往來無剽劫患先後在鎮二十四年軍民戴之謹附考

松潘衛傳宣德七年陞龍州為宣撫司

臣章宗瀛按

統志及明史地理志俱言宣德七年陞龍州為宣撫使此作九年誤謹據改 舊本七作九謹據改

天全衛傳可自碉門出枯木場 臣章宗瀛按方輿紀

要自碉門出枯木場徑抵長河西此作枯木任場誤謹據改並添一字以符勻刻西口舊本又誤作自碉門出枯木任場謹據改

黎州衛傳臘乃卜最强世居西河 臣章宗瀛按萬歷

初臘乃卜僭稱王殺略榮丁因賴村沐川長官以狀

聞廷議征之以守備劉繼祖等為將軍帥總旗胡祿
戰於大赤口祿中流矢死繼祖等被報都御史徐元
太上書按赤口失律狀而都司李獻忠竟以孤軍擣
賊勦諸將郭成等四路並進斬其渠魁賊乃下乃降
見蠻司合志謹附考

明史卷三百十一考證

欽定四庫全書蒼要卷六千九百五

史部

明史卷三百十二

大學士張廷玉等奉 敕修

列傳第二百

四川土司二

播州宣慰司

永寧宣撫司

酉陽宣撫司

石砫宣撫司

遵義府即播州秦為夜郎且蘭地漢屬牂牁唐貞觀中

改播州乾符初南詔陷播太原楊端應募復其城為播
人所懷服歷五代子孫世有其地宋大觀中楊文貴納
土置遵義軍元世祖授楊邦憲宣慰使賜其子漢英名
賽音布哈封播國公洪武四年平蜀遣使諭之五年播
州宣慰使楊鏗同知羅琛總管何嬰蠻夷總管鄭瑚等
相率來歸貢方物納元所授金牌銀印銅章詔賜鏗衣
幣仍置播州宣慰使司鏗琛皆仍舊職領安撫司二曰
草塘曰黃平長官司六曰真州曰播州曰餘慶曰白泥

曰容山曰重安以嬰等為長官七年中書省奏播州土地既入版圖當收其貢賦歲納糧二千五百石為軍儲帝以其率先來歸田稅隨所入不必以額已復置播州黃平宣撫司播州江渡蠻黃安作亂貴州衛指揮張岱討平之八年鏗遣其弟錡來貢賜衣幣自是每三歲一入貢十四年遣使齎敕諭鏗比聞爾聰浮言生疑貳令大軍南征多用戰騎宜率兵二萬馬三千為先鋒庶表爾誠十五年城播州沙溪以官兵一千人士兵二千人

戊之改播州宣慰司隸貴州改黃平衛為千戶所十七年鏗子震卒於京命有司歸其喪二十年徵鏗入朝貢馬十匹帝諭以守土保身之道賜鈔五百錠二十一年播州宣慰使司并所屬宣撫司官各遣其子來朝請入太學帝敕國子監官善訓導之永樂四年免播州荒田租設重安長官司隸播州宣慰司以張佛保為長官以佛保嘗招輯重安蠻民嚮化故也七年宣慰使楊昇招諭草塘黃平重安所轄當科葛雍等十二寨蠻人來歸

宣德三年昇賀萬壽節後期禮部議予半賞帝以道遠
勿奪其賜七年草塘所屬穀傲等四十一寨蠻作亂總
兵陳懷勦撫之旋定正統十四年宣慰使楊綱老疾以
其子輝代景泰三年輝奏湖貴所轄臻剖五仝等苗賊
糾合草塘江渡諸苗黃龍韋保等殺掠人民屢撫復叛
乞調兵征勦以靖民患帝命總督王來總兵梁瑤等會
同四川巡撫勦之七年調輝兵征銅鼓五開叛苗賜敕
頒賞成化十年以播州賊齋果等屢歲為患敕責川貴

鎮巡官正統末苗蠻聚衆寇邊土官同知羅宏奏輝有疾乞以其子愛代帝命愛襲職仍敕愛即率兵從總兵官勦賊先是輝奏所屬天壩干地五十三寨及重安所轄灣溪等寨屢被苗蠻占據乞令湖貴會兵征之命如輝言部議以愛年幼請仍起輝暫理軍事又以輝難獨任宜敕都御史張瓚親至播州督理勵輝等振揚威武以備征調其機宜悉聽瓚裁處十二年瓚督諸軍及輝攻敗灣溪天壩干地諸苗凡破山寨十六斬首四百九

十六級撫男婦九千八百餘口事下兵部以苗就撫者
多宜量為處分瓚議設安寧宣撫司并懷遠宣化二長
官司建靖南龍場二堡命輝董其役輝調兵民五千餘
立治所委所屬黃平諸長官分甓城垣將竣輝因奏各
寨苗蠻近頗知懼但大軍還後難保無虞播州向設操
守土兵一千五百人今撥守懷遠靖南天漂龍場各二
百人宣化百人安寧六百人其家屬宜徙之同居為固
守計其工之未畢者宜命臣子愛董之而聽臣致仕如

故詔從之時灣溪既立安寧宣撫爛土諸蠻惡其逼遂引齋果等攻陷天漂靖南城堡圍安寧愛新襲力弗能支求援於川貴二鎮兵部奏起輝再統兵勦之又敕川貴兵為助十五年貴州巡撫陳儼奏苗賊齋果轉橫乞調川湖等官軍五萬五千尅期會貴州聽儼節制兵部言賊作於四川而貴州守臣自欲節制諸軍恐有邀功之人主之且興師五萬以半年計須軍儲十三萬五千石山路險峻輸運之夫須二十七萬衆況天將暑瘴癘

可虞帝然其奏二十二年愛兄宣撫楊友訐奏輝在日
刑部侍郎何喬新往勘二十三年喬新奏輝在日溺其
庶子友欲令承嗣長官張淵阿順之安撫宋韜謂楊氏
家法立嗣以嫡愛宜立輝不得已立愛又欲割地以授
友謀於淵因以天壩干乃本州懷遠故地為生苗所據
請兵取之容山長官韓瑄以土民安輯日久不宜征淵
與輝計執瑄杖殺之前巡撫張璿受輝賂以其地設安
寧宣撫司員以友任宣撫輝立券以所有金玉服用莊

田召諸子均分之輝沒淵乃與友潛謀刺愛淵弟深亦與謀不果友遂奏愛居處器用僭擬朝廷又通唐府家書往來私習兵法天文謀不軌事皆誣帝命斬淵深以愛信讒薄兄友因公擅殺且謀嫡盜官錢皆有罪愛贖復任友遷保寧羈管仍赦喬新從宜處治弘治元年增設重安守禦千戶所命播州歲調土兵一千助戍守七年以平苗功賜敕勞愛十四年調播州兵五千征貴州賊婦米魯等正德二年陞播州宣慰使楊斌為四川按

察使仍理宣慰事舊制土官有功賜衣帶或旌賞部衆無列銜方面者斌狡橫不受兩司節制諷安撫羅忠等上其平善安等戰功重賂劉瑾得之踰年巡按御史俞繼言不宜授乃裁之仍原職初友既編置保寧受益恣厚斂以賄中官征取友向所居凱里地者獨苛同知楊才居安寧乘之賸剝尤甚諸苗憤怒凱里民為友奏復官弗得乃潛入保寧以友還糾衆作亂攻播州焚愛居第及公私廨宇略盡遂殺才多所殘戮愛屢奏於朝帝

命鎮巡官調兵征之會友死遂緩師已而鎮巡官言友
子弘能悔過自新且善撫馭蠻衆願聽其約束其前為
友所焚殺者俱已隨土俗折償且還所侵奪於官乞授
弘冠帶為土舍協同播州經歷司撫輯諸蠻其家衆置
保寧者仍歸之隸播州管轄并諭斌與弘協和不得再
造釁端報可未幾播州安撫宋准奏貴州凱口爛土苗
婚於凱離草塘諸寨陰相構結誘山苗為亂乞賜斌敕
令每年巡視邊境會湖廣鎮巡官撫處部議土官向無

領敕出巡者諭斌宜撫綏土衆輯睦親族以副朝廷優

待之意因授致仕宣慰愛為昭毅將軍給誥命賜麒麟

服時斌又為其父請進階及服色禮科駁之以服色等

威所繫不可假兵部以愛舊有勦賊功皆許之斌復為

其子相請入學并得賜冠帶十二年播州安撫羅忠宋

淮等奏斌有父喪欲援文臣例守制但邊防為重乞仍

令掌印理事初楊宏既歸凱里與重安土舍馮綸等有

怨宏卒綸等誘苗蠻攻之更相仇殺侵軼貴州境巡撫

鄒文盛言狀且請移文四川會官撫處踰歲不報文盛乃遣參議蔡潮入播州督致任楊斌撫平之因言宜復安寧宣撫俾宏子弟襲之斌未衰宜仍起任事以制諸蠻寨潮有撫蠻勞宜量擢兵部議安寧已革不可復斌子既代亦不可起土官應襲與否屬四川非黔所得專盛所請難行而功不可誣十六年賜斌蟒衣玉帶嘉靖元年賜播州儒學四書集註從宣慰楊相奏也宏既死其弟張求襲職不得時盜邊劫白泥司印信復與相構

兵守臣乞改凱里屬貴州以張為土知州解釋之兵部
議張習父兄之惡幸免於辜敢肆然執印信以要挾當
命川貴守臣按其前後爭產殺人諸罪寘於理若張悔
過輸情還所獲印尚可量授一官聽調殺賊以自効倘
或怙終必誅以為玩法戒既遂許張襲宣撫而改安寧
為凱里隸貴州初楊相之祖父皆以嫡庶相爭梯禍數
世至是相復寵庶子煦嫡子烈母張悍甚與烈盜兵逐
相相走客死水西烈求父屍宣慰安萬銓因要挾水烟

天旺故地而後予屍烈陽許之及相喪還烈斬地不予
遂與水西構難又殺其長官王黻時嘉靖二十三年也
烈既代襲遂與黻黨李保治兵相攻垂十年總督馮岳
調總兵石邦憲討平之真州苗盧阿項者亦久稱亂邦
憲以兵七千擊敗之有言賊求援於播者邦憲曰吾方
調水西兵聲揚烈助逆罪烈暇救人乎己禽阿項父子
斬獲四百餘人初嘉靖初議分凱里屬貴州既又以播
地多在貴州境并改屬思石兵備及真州盜平地方安

靖播人以為非便川貴守臣異議不決命總督會勘總督奏仍以播歸四川而貴州思石兵備仍兼制播百平邑諸土司事報可隆慶五年烈死子應龍請襲命予職萬歷元年給應龍宣慰使敕書八年賜故宣慰楊烈祭葬從應龍請也十四年應龍獻大木七十材美賜飛魚服又復引其祖斌賜蟒例部議以斌有軍功且出特恩未可為此帝命以都指揮使銜授應龍十八年貴州巡撫葉夢熊疏論應龍兇惡諸事巡按陳效歷數應龍二

十四大罪時方防禦松潘調播州土兵協守四川巡按李化龍疏請暫免勘問俾應龍戴罪圖功由是川貴撫按疏辨在蜀者謂應龍無可勘之罪在黔者謂蜀有私暱應龍之心於是給事中張希臯等以事屬重大兩省利害豈漫不相關者乞從公會勘無執成心十九年夢熊主議播州所轄五司改土為流悉屬重慶與化龍意復相左化龍遂引熈求斥蓋應龍本雄猜阻兵嗜殺所轄五司七姓悉叛離嬖妾田屠妻張氏并及其母妻叔

張時照與所部何恩宋世臣等上變告應龍反夢熊請
發兵剿之蜀中士大夫悉謂蜀三面鄰播屬裔以什伯
數皆其彈壓且兵驍勇數征調有功剪除未為長策以
故蜀撫按並主撫朝議命勘應龍願赴蜀不赴黔二十
年應龍詣重慶對簿坐法當斬請以二萬金贖御史張
鶴鳴方駁問會倭大入朝鮮徵天下兵應龍因奏辨且
願將五千兵征倭自贖詔釋之兵已啓行尋報罷巡撫
王繼光至嚴提勘結應龍抗不出張時照等復詣奏闕

下繼光用兵之議遂決二十一年繼光至重慶府總兵劉承嗣等分兵三道進婁山關屯白石口應龍佯約降而統苗兵據開衝擊承嗣兵敗殺傷大半會繼光論罷即撤兵委棄鞬重略盡黔師協剿亦無功時四川新撫譚希忠與貴州鎮撫再議剿御史薛繼茂主撫應龍上書自白遣其黨攜金入京行間竟自執原奏何思詣碁江縣二十二年以兵部侍郎邢玠總督貴州二十三年玠至蜀察永寧酉陽皆應龍姻媾而黃平白泥久為仇讐宜

剪其枝黨乃檄應龍謂當待以不死會水西宣慰安疆
臣請父國亭邱典兵部尚書石星手札云疆臣趣應龍
就吏得賞疆臣奉札至播招應龍時七姓恐應龍出得
除罪而四方亡命竄匿其間又幸龍反因以為利驛傳
文移輒從中阻玠檄重慶知府王士琦詣綦江趣應龍
安穩聽勘應龍使弟兆龍至安穩治郵舍儲糒叩頭郊
迎至餼牽如禮言應龍縛渠魁待罪松坎所不敢至安
穩者恐墮安穩仇民不測禍也幸請至松坎受事士琦

曰松坎亦曩奏勘地即單騎往應龍果面縛道旁泣請
死罪願執罪人獻罰金得自比安國亨國亨者曩亦被
許懼罪不出界故應龍引之士琦為請于玠許之應龍
乃縛獻黃元等十二人案驗抵應龍斬論贖輸四萬金
助採木仍革職以子朝棟代次子可棟羈府追贖黃元
等斬重慶市總督以聞時倭氛未靖兵部欲緩應龍事
東方朝廷亦以應龍向有積勞可其奏於松坎設同知
治馬以士琦為川東兵備副使彈治之應龍獲寬益怙

終不悛尋可棟死於重慶益痛恨促喪歸不得復檄完

贖大言曰吾子活銀即至矣擁兵驅千餘僧招魂去分

遣土目置關據險厚撫諸苗名其健者為硬手州人稍

殷厚者沒入其貨以養苗苗人咸願為出死力二十四

年應龍殘餘慶掠大阡都霸焚劫草塘餘慶二司及興

隆都勻各衛又遣其黨圍黃平戮重安長官家勢復大

熾二十五年流劫江津及南川臨合江索其仇袁子升

緇城下磔之時兵備王士琦調征倭應龍益統苗兵大

掠貴州洪頭高坪新村諸屯已又侵湖廣四十八屯阻
塞驛站詞原奏仇民宋世臣羅承恩等挈家匿偏橋衛
襲破之大索城中戮其父母淫其妻女備極慘酷二十
七年貴州巡撫江東之令都司楊國柱部卒三千勦應
龍奪三百落賊佯北誘師殲焉國柱等盡死東之罷以
郭子章代而起李化龍節制川湖貴州諸軍事調東征
諸將劉綎麻貴陳璘董一元南征時應龍乘大兵未集
勒兵犯碁江城中新募兵不滿三千賊兵八萬奄至游

擊張良賢巷戰死綦江陷應龍盡殺城中人投屍蔽江水為赤益結九股生苗及黑脚苗等為助屯官壩聲窺蜀已遂焚東坡爛橋焚黔路梗二十八年應龍五道並出破龍泉司時總督李化龍已移駐重慶徵兵大集遂以二月十二日誓師分八路進每路約三萬人官兵三之土司三之旗鼓甲仗森列苗大驚總兵劉綎破其前鋒楊朝棟僅以身免賊膽落遂連克桑木烏江渡三關奪天都三百落諸固賊連敗乃乘隙突犯烏江詐稱水

西隴澄會哨誘永順兵斷橋淹死將卒無算尋緹破九
盤入婁山關開為賊前門萬峰插天中通一線緹從間
道攀藤毀柵入陷焉四月朔師屯白石應龍率諸苗決
死戰緹親勒騎衝中堅分兩翼夾擊敗之追奔至養馬
城連破龍爪海雲險固壓海龍固賊所倚天險謂飛鳥
騰猿不能逾者時偏沅師已破青蛇固安疆臣亦奪落
濠關至大水田焚桃溪莊賊見勢急父子相抱哭上固
死守每路投降文綏師總兵吳廣入崖門開營水牛塘

與賊力戰三日却之賊令婦人於國上上拜表痛哭云
田氏且降復詐為應龍仰藥死報廣廣輕信按兵已覘
賊詐益厲兵攻燒二關奪賊樵汲路八路師大集海龍
國遂築長圍更番迭攻賊知必死會化龍聞父喪詔以
纒墨視師化龍念賊前國險不能越令馬孔英率勅兵
併力攻其後天苦雨將士馳泥淖中苦戰六月四日天
忽霽綈先士卒克土城應龍益迫散金募死士拒戰無
應者起提刀巡壘見四面火光燭天大兵已登國破土

城入應龍倉皇同愛妾二闔室縊且自焚吳廣獲其子
朝棟急覓應龍屍出焰中賊平計出師至滅賊百十有
四日八路共斬級二萬餘生獲朝棟等百餘人化龍露
布以聞獻俘闕下劉應龍屍磔朝棟兆龍等於市播州
自唐入楊氏傳二十九世八百餘年至應龍而亡三十
一年播州餘逆吳洪盧文秀等叛總兵李應祥等討平
之分播地為二屬蜀者曰遵義府屬黔者為平越府
永寧唐蘭州地宋為瀘州江安合江二縣境元置永寧

路領筠連州及騰川縣後改為永寧宣撫司洪武四年

平蜀永寧內附置永寧衛六年筠連州滕大寨蠻編張
等叛詐稱雲南兵據湖南長寧諸州縣命成都衛指揮
袁洪討之洪引兵至叙州慶符縣攻破清平開禽偽千
戶李文質等編張遁走復以兵犯江安諸縣洪追及之
又敗其衆焚其九寨獲編張子偽鎮撫張壽編張遁匿
溪洞餘黨散入雲南帝聞之敕諭洪曰南蠻叛服不常
不足罪既獲其俘宜編為軍且駐境上必以兵震之使

警天威無遺後患未幾張復聚衆據滕大寨洪移兵討
敗之追至小芒部張遁去遂取得花寨禽阿晉等自是
張不敢復出其寨悉平遂降筠連州為縣屬敘州以九
姓長官司隸永寧安撫司八年正月陞永寧等處軍民
安撫司為宣撫使司秩正三品以祿照為宣撫使十七
年永寧宣撫使祿照貢馬詔賜鈔幣冠服定三年一貢
如例十八年祿照遣弟阿居來朝言比年賦馬皆已輸
惟糧不能如數緣大軍南征蠻民驚竄耕種失時加以

兵後疾疫死亡者多故輸納不及命蠲之二十三年永寧宣撫言所轄地水道有一百九十灘其江門大灘有十二處皆石塞其流詔景川侯曹震往疏鑿之二十四年震至瀘州按視有枝河通永寧乃鑿石削崖以通漕運二十六年以祿照子阿聶襲職先是祿照坐事逮至京得直還卒於途其子阿聶與弟智皆在大學遂以庶母奢尾署司事至是奢尾入朝請以阿聶襲從之永樂四年免永寧荒田租宣德八年故宣撫阿聶妻奢蘇朝

貢九年宣撫奢蘇奏生儒皆土獠朝廷所授官言語不
通難以訓誨永寧監生李源資厚學通乞如雲南鶴慶
府例授為儒學訓導詔從之景泰二年減永寧宣撫司
稅課局鈔以苗賊竊發客商路阻從布政司請也成化
元年山都掌大壩等寨蠻賊分劫江安等縣兵部以聞
二年國子學錄黃明善奏四川山都掌蠻屢歲出沒殺
掠良民景泰元年招之復叛天順六年撫之又反近總
兵李安令永寧宣撫奢貴赴大壩招撫亦未效恐開釁

無已宜及大兵之集早為定計毋釀邊患三年明善復
言宋時多剛縣蠻為寇用白芡子兵破之白芡子者即
今之民壯多剛縣者即今之都掌多剛寨也前代用鄉
兵有明效宜急募民壯以助官軍都掌水稻十月熟宜
督兵先時取其田禾則三月之內蠻必餒矣軍宜分三
路南從金鷲池攻大壩中從戎縣攻箐前北從高縣攻
都掌小寨破大寨自拔又大壩南百餘里為芒部西南
二百里為烏蒙令二府土官截其險要更用火器自下

而上順風延燕寨必可攻且征調土兵須處置得宜招募民壯須賞罰必信詔總兵官參用之時總督尚書程信亦奏都掌地勢險要必得土兵嚮導請敕東川芒部烏蒙烏撒諸府兵並速調湖廣永順保靖兵以備征遣又請南京戰馬一千應用皆報可四年信奏永寧宣撫奢貴開通運道禽獲賊首宜降璽書獎賚從之十六年白羅羅昇子與都掌大壩蠻相攻禮部侍郎周洪謨言臣殺人也知敘蠻情戎珙筠高諸縣在前代皆土官國

朝始代以流言語性情不相習用激變洪永宣正四朝
四命將徂征隨服隨叛景泰初益滋蔓至今為梗臣向
嘗言仍立土官治之為久遠計而都御史汪浩傲幸邊
功誣殺所保土官及寨主二百餘人諸蠻怨入骨髓轉
肆劫掠及尚書程信統大兵僅能克之臣以謂及今順
蠻人之情擇其衆所推服者許為大寨主俾世襲庶可
相安又言白羅羅者相傳為廣西流蠻有衆數千無統
屬景泰中糾戎瑛苗攻破長寧九縣今又侵擾都掌其

所居崖險箐深既難剪滅亦宜立長官司治之地近芒
部宜即隸之羿子者永寧宣撫所轄而永寧乃雲貴要
衝南跨赤水畢節六七百里以一柔婦人制數萬強梁
之衆故每肆劫掠臣以為宣撫土獠仍令宣撫奢貴治
之其南境寨蠻近赤水畢節要路者宜立二長官司仍
隸永寧宣撫夫土官有職無俸無損國儲有益邊備從
之二十五年永寧宣撫司女土官奢祿獻大木給誥如
例萬歷元年四川巡撫曾省吾奏都蠻叛逆發兵征討

土官奢劾忠首在調但與貴州土官安國亨有讐請並
令總兵官劉顯節制使不得藉口復讐妄有騷動從之
初烏撒與永寧烏蒙水西霑益諸土官境相連復以世
戚親厚既而安國亨殺安信信兄智結永寧宣撫奢劾
忠報讐彼此相攻而安國亨部下吏目與智有親恐為
國亨所殺因投安路墨墨詐稱為土知府安承祖赴京
代奏已而國亨亦令其子安民陳訴與奢劾忠俱奉命
聽勘於川貴巡撫議照蠻俗罰牛贖罪報可劾忠死妻

世統無子娶世績有幼子崇周世統以嫡欲奪印相讐

殺方奏報間總兵郭成參將馬呈文利其所有遽發兵

千餘深入落紅奢氏九世所積搜掠一空世績亦發兵

尾其後効忠弟沙卜出拒戰且邀水西兵報讐成兵敗

績乃檄取沙卜於世統統不應復殺把總三人聚苗兵

萬餘欲攻永寧洩怨巡按劾成等邀利起釁宜速而議

予二土婦冠帶仍分地各管所屬其宣撫司印俟奢崇

周成立赴襲理事報可十四年奢崇周代職未幾死奢

崇明者幼忠親弟盡忠子也幼孤依世統撫養一十三

年至是送之永寧世續遺之羶馬許出印給之事已定

而諸奸閭宗傳等自以昔從世續遂世統殺沙卜懼崇

明立必復前恨遂附水西立阿利以自固安疆臣陰陽

其間蠻兵四出焚劫屯堡官兵不能禁總督以聞朝議

命奢崇明暫管宣撫事冀崇明蠲夙恨以收人心而閩

宗傳等攻掠永寧普寧摩尼如故崇明承襲幾一載世

續印竟不與且以印私安疆臣妻弟阿利巡撫遣都司

張神武執世續索印世續言印在鎮雄隴澄處隴澄者水西安堯臣也隴氏垂絕堯臣入贅遂冒隴姓稱隴澄敘平播州敘州功澄與馮中朝不知其為堯臣也堯臣外怙播功內仗水西有據鎮雄制永寧心蜀撫按以堯臣非隴氏種無授鎮雄意堯臣以是懷兩端陰助世續意世續得授阿利則已據鎮雄益堅又朝廷厭兵宗傳阿利等方驛騷已可卧取隴氏也而閻宗傳等每焚掠必稱鎮雄兵以怖諸部川南道梅國樓所俘蠻丑者言

鎮雄遣將魯大功督兵五營屯大壩水西兵已渡馬鈴堡約攻永寧普市遂潰宗傳等以空城棄去奢崇明又言堯臣所遣目杞彭月政魯仲賢六大營助逆不退聲言將抵敘南攻永寧瀘州於是總兵侯國弼等皆歸惡於堯臣都司張神武等所俘喚者朗者皆鎮雄土目堯臣亦不能解黔中撫按以西南多事兵食俱誣無意取鎮雄堯臣因以普市摩尼諸焚掠皆歸之蜀將議者遂以貪功起釁為蜀將罪四川巡撫喬璧星言堯臣狡謀

欲篡鎮雄垂涎蘭地有年矣宗傳之背逆恃鎮雄猶鎮
雄之恃水西也水西疆臣不助兵臣已得其狀宜乘逆
孽未成令貴州撫按調兵與臣會勘倘堯臣稔惡如故
臣即移師擊之毋使弗摧之虺復為蛇弗室之罅復為
河也疏上廷議無敢決用師者久之阿利死印亦出蜀
中欲逐堯臣之論卒不可解時播州清疆之議方沸騰
黔蜀各紛紛至是永寧議兵又如聚訟矣時朝廷已一
意休兵三十五年命釋奢世績赦閻宗傳等罪訪求隴

氏子孫為鎮雄後並令安疆臣約束堯臣歸本土司聽
遙授職銜不許冒襲隴職於是宗傳降堯臣請避去黔
督遂請撤師舊制永寧衛隸黔土司隸蜀自水蘭交攻
軍民激變奢崇明雖立而行勘未報摩尼普市千戶張
大策等復請將永寧宣撫改土為流兵部言無故改流
置崇明何地命速完前勘諸案於是蜀撫擬張大策以
失守城池罪應斬黔撫擬張仲武以擅兵劫掠罪亦應
斬策黔人武蜀人也由是兩情皆不平諸臣自相構訟

復紛結不解會奢崇明子寅與水西已故土官妻奢社輝爭地安兵馬十倍奢而奢之兵精兩相持蜀黔撫按不能制以狀聞四十八年黔撫張鶴鳴以赤水衛白撒所屯地為永寧占據宜清還皆待勘未決天啓元年崇明請調馬步兵二萬援遼從之崇明與子寅久蓄異志借調兵援遼遣其婿樊龍部黨張彤等領兵至重慶久駐不發巡撫徐可求移鎮重慶趣永寧兵樊龍等以增行糧為名乘機反殺巡撫道府總兵等官二十餘員遂

據重慶分兵攻合江納溪破瀘州陷遵義興文知縣張

振德死之興文故九絲蠻地也進圍成都偽號大梁布

政使朱燮元周著按察使林宰分門固守石砭土司女

官秦良玉遣弟明屏姪翼明等發兵四千倍道兼行潛

渡重慶營南坪關良玉自統精兵六千沿江上趨成都

諸援兵亦漸集時寅攻城急陰納劉勳等為內應事覺

伏誅復造雲梯及早船晝夜薄城城中亦以礮石擊毀

之相持百日會賊將羅乾象遣人輸款願殺賊自効是

夜乾象縱火焚營賊兵亂崇明父子倉皇奔錢帛穀米
委棄山積窮民賴以得活乾象因率其黨胡汝高等來
降時變元已授巡撫率川卒追崇明江安新都遵義諸
郡邑皆復時二年三月也樊龍收餘衆數萬據重慶險
塞變元督良玉等奪二郎關總兵杜文煥破佛圖關諸
將迫重慶而軍奢寅遣賊黨周鼎等分道來救鼎敗走
為合江民所縛官軍與平茶酉陽石碛三土司合圍重
慶城中乏食變元遂以計禽樊龍殺之張彤亦為亂兵

所殺生禽龍子友邦及其黨張國用石永高等三十餘人遂復重慶時安邦彥反於貴州崇明遙倚為聲援三年川師復遵義進攻永寧遇奢寅於土地坎率兵搏戰大兵奮擊敗之寅被創遁樊虎亦戰死進克其城降賊二萬復進拔紅崖天台諸囤寨降者日至崇明勢益威求救於水西邦彥遣十六營過河援之羅乾象急破蘭州焚九鳳樓覆其巢崇明踉蹌走投水西邦彥與合兵分犯遵義永寧川師敗之於芝蔴塘賊遁入青山諸將

逼渭河廕入龍場陣獲崇明妻安氏及奢崇輝等斬獲
萬計蘭州平總督朱燮元請以赤水河為界河東龍場
屬黔河西赤水永寧屬蜀永寧設道府與遵義建武聲
勢聯絡未幾貴州巡撫王三善為邦彥所襲死崇明勢
復張將以踰春大舉寇永寧會奢寅為其下所殺而燮
元亦以父喪去崇明邦彥得稽誅崇明稱大梁王邦彥
號四裔大長老諸稱元師者不可勝計合兵十餘萬規
先犯赤水崇禎初起燮元總督貴湖雲川廣諸軍務大

會師變元定計誘賊深入向永寧邀之於五峰山桃紅壩令總兵侯良柱大敗之崇明邦彥皆授首是役也掃蕩蜀黔數十年巨憝前後皆變元功云

酉陽漢武陵郡酉陽縣地宋為酉陽州元屬懷德府洪武五年酉陽軍民宣慰司冉如彪遣弟如喜來朝貢置酉陽州以如彪為知州八年改為宣撫司仍以冉如彪為使置平茶邑梅麻兔石耶四洞長官司以楊底網楊金奉丹德原楊隆為之每三年一入貢石耶不能親至

京命附於胄陽二十七年平茶洞署長官楊再勝謀殺
兄子正賢及洞長楊通保等正賢等覺之逃至京師訴
其事且言再勝與景川侯謀反帝命逮再勝鞠之再勝
辭服當族誅正賢亦應緣坐帝誅再勝釋正賢使襲長
官胄陽宣撫再興邦以襲職來朝命改隸渝州永樂三
年指揮丁能杜福撫諭亞堅等十一寨生苗一百三十
六戶各遣子入朝命隸胄陽宣撫司四年免胄陽荒田
租五年興邦遣部長龔俊等貢方物並謝立儒學恩景

泰七年調宣撫僉事丹廷璋兵征五開銅鼓叛苗賜敕諭賞賚天順十三年命進宣撫冉雲散官一階以助討叛苗及禽石全州之功也弘治七年宣撫冉舜臣以征貴州叛苗功乞陞職兵部以非例請進舜臣階明威將軍賜敕褒之十二年舜臣奏宋農寨蠻賊糾脅諸寨洞蠻殺勝焚劫乞勦捕保靖永順二宣慰亦奏邑梅副長官楊勝剛父子謀據酉陽結俊倍洞長楊廣震等號召宋農後溪諸蠻聚兵殺掠請並討兵部議酉陽溪洞連

絡易煽動宜即撲滅請行鎮巡官酌機宜十四年調酉陽兵五千協勦貴州賊掃米魯正德三年酉陽宣撫司護印舍人冉廷璽及邑梅長官司奏湖廣鎮溪所洞苗聚衆攻劫請兵勦捕八年宣撫冉元獻大木二十乞免男維翰襲職赴京從之二十年元再獻大木二十詔量加服色酬賞萬歷十七年宣撫冉維屏獻大木二十價適三千工部議應加從三品服以為土官輸誠之勸從之四十六年調酉陽兵四千命宣撫冉躍龍將之援遠

四十七年躍龍遣子天允及文光等領兵赴遼陽駐虎
皮黃山等處三載解奉集之圍再援瀋陽以渾河失利
冉見龍戰沒死者千餘人撤守遼陽又以降敵縱火冉
文煥等戰沒死者七百餘人兵部尚書張鶴鳴言躍龍
遣子弟萬里勤王見龍既殺身殉國躍龍又自捐金二
千兩運軍器至山海關振困招魂忠義可嘉臣在貴州
時躍龍亦自捐餉征紅苗屢建奇功今又著節於邊宜
加優恤以風諸邊天啓元年授躍龍宣慰使並妻舒氏

皆給誥命仍恤陣亡千七百餘家二年奢崇明叛躍龍
率援師合圍重慶及崇明誅其土舍冉紹文與有功四
年躍龍以東西赴調致命為弟見龍及諸陣亡者請賚
卹命下所司崇禎九年宣慰使冉天麟疏言庶孽天允
假旨謀奪臣爵土不遂擅兵戕殺下撫按察勘時蜀方
憂盜大吏自顧不暇土官事多寢閣云

石砭以石潼關砭蒲關而名後周置施州唐改青江郡
宋末置石砭安撫司元改石砭軍民府尋仍為安撫司

洪武七年石砭安撫使馬克用遣其子付德與同知陳世顯入朝貢方物八年改石砭安撫司為宣撫司隸重慶府十六年石砭溪蠻寇施州黔江守禦官軍擊破之十八年石砭宣撫同知陳世顯遣子興潮等奉表貢方物賀明年正旦二十四年賜石砭宣撫同知陳興潮及其子文義白金百兩以從征散毛洞有功故也宣德五年命宣撫馬應仁于鎮為宣撫初應仁有罪應死貸請戍至是帝念其祖克用嘗効力先朝命求其子孫之良

者用之故有是命成化十八年四川巡撫孫仁奏三月
內盜三百人入石砭殺宣撫馬澄及隸卒二十餘人焚
掠而去以石砭地鄰鄆都互爭銀場相訐有司不為區
治致相讐殺命責有司捕賊仁奏石砭歲辦鉛課五千
一百三十斤正統後停之鄰境軍民假以徵課乘機竊
取釀成禍階請除其課閉其洞仍移忠州臨江巡檢於
鄆都南賓里之姜池以便防守從之是年命馬徽為宣
撫萬歷二十二年石砭女土官覃氏行宣撫事土吏馬

邦聘謀奪其印與其黨馬斗斛斗霖等集衆數千圍覃
氏縱火焚公私廬舍八十餘所殺掠一空覃氏上書言
臣自從征疊茂擊賊大雪山斬首捕寇皆著有成勞屢
膺上官獎賞今邦聘無故虐劉孤寡臣豈不能出一旅
與之角勝負誠以非朝命不敢也今叛人斯在請比先
年楚金洞舍覃碧謀篡事願與邦聘同就吏二十三年
命四川撫按讞其獄事未決會楊應龍反播州覃與應
龍為姻而斗斛亦結應龍兩家觀望獄遂解覃氏有智

計性淫故與應龍通長子千乘失愛暱次子千駟謂應龍可恃因聘其女為千駟妻千駟入播同應龍反千乘襲馬氏爵應調與百陽冉御龍同征應龍應龍敗千駟伏誅而千乘為宣撫如故千乘卒妻秦良玉以功封夫人自有傳

明史卷三百十二

欽定四庫全書

明史卷三百十二考證

遵義府傳景泰三年楊輝奏黃龍韋保等殺掠人民

臣章宗瀛按景泰二年貴州賊首韋同烈偽稱苗王糾衆數萬屯與興隆之截洞攻平越清平湖廣總督王來率總兵梁珪等進勦縛同烈械送京師五年四川苗賊黃龍韋保偽稱平天大王聚衆攻劫播州等處貴州提督御史蔣琳率官軍進勦擒韋保等同送

京師見明實錄謹附考

導義府傳應龍本雄猜阻兵嗜殺 臣章宗瀛按應龍

所居僭飾龍鳳用繡女閹人嬖妾田氏雌鳳疑嫡妻
張氏姦淫出之已而飲田氏兄所乘醉封刀取張氏
及其母屠其家而初惑七姓言虐所屬黃平五司既
而覺七姓欺已遂結關外生苗戕七姓見蠻司合志
謹附考

導義府傳應龍上書自白遣其黨携金入京行間執原

奏何恩詣綦江縣

臣

章宗瀛按蠻司合志言應隆

遣行間者懷金入京為原奏何恩所執解綦江縣此
言執原奏何恩詣綦江縣彼此迥異查何恩係告應
龍謀反之人是時應龍方上書自白斷無敢執原奏
之理且綦江係內地執詣內地尤屬無謂應以蠻司
合志為何恩執應龍所遣攜金入京行間之人為是
謹據改并節去上文二字以符句刻

永寧傳七年陞永寧等處軍民安撫司為宣撫使司

臣章宗瀛按陞水寧安撫司為宣撫司統志及地理志俱作八年正月此作七年誤謹據改再此處既作八年則下文八年二年應刪去於上文增入二字以符句刻

水寧街傳國子學錄黃明善奏四川山都掌蠻屢歲出沒臣章宗瀛按明善奏有平蠻三策一竄之鄰境以離其黨欲將都掌蠻民分隸烏撒等四府安置撫恤有不從者許土官勦之則兵不血刃而境土自安

矣二分屬漢蠻以別具類都掌地與永寧芒部相錯
接永寧者割隸永寧接芒部者割隸芒部而該縣止
管漢民則漢蠻各有統屬矣三據險固守以待其覓
都掌北距叙州馬湖無北走之路今宜選將領兵由
納漢斷其後門半年之內皆為餓殍矣見明實錄傳
未載謹附考

永寧街傳効忠死妻世統無子

臣章宗瀛按効忠死

崇周當襲職顧稚弱而總兵劉顯見世續而喜遂以

世績請冠帶視宣撫事効忠弟沙卜通方其嫂世統欲世統襲其兄職而朝命屬世績大怒遂囑夷目攻世績于落紅世績遁居永寧見蠻司合志謹附考

永寧街傳十四年屠崇周代職未幾死臣章宗瀛按

蠻司合志言二十三年征揚應隆崇周應調已行沙

卜伏甲道左將殺崇周崇周力戰斬二十八級追沙

卜至河殺之沙卜之子白僕亾之貴陽密使白卷芳

以盞飲崇周崇周死是崇周於十四年龍襲職至二十

三年征楊應龍時已十年不可謂未幾謹改并節去
上文二年以符勻刻

永寧街傳樊龍等以增行糧為名乘機反

臣章宗瀛

按時以邊事急徵四方兵崇明上疏請提兵三萬赴
援遣其將樊龍等以兵至重慶巡撫徐可求點核汰
其老弱索餉餉復弗繼龍等遂鼓衆反舞榭刺殺可
求遂一擁而上道臣孫孜古駱日升李繼周知府章
文炳同知王世科熊嗣先推官王三宅知縣段高選

總兵黃守魁王守忠叅將萬金玉登爵皆死之原任
鞏昌同知董盡倫聞變率衆入城殺賊遇伏死見通
鑑紀事謹附考

水寧街傳樊龍分兵攻合江納漢

臣章宗瀛按瀘州

有納溪縣因縣西有納溪故名此作納溪誤據地理
志及統志謹考

酉陽州傳元屬懷德府

臣章宗瀛按酉陽州元史及

明史地理志皆言屬懷德此言屬紹慶誤謹據改

明史卷三百十二考證

